

## Sicole

### Les spots et les ratourneures

On spot, c' est ene coûte fråze ki dene ene luçon u ki fwait tuzer.

C' est todi les ptits k' on spotche.

L' ome roye et l' Bon Diu disroye.


Après les grands ramasseus, les grands stâreus

C' est todi l' ci à pî d' l' egljhe k' arive e rtård a messe

Li ci ki n' a nén des mehins è ratind

On n' candje nén si tchvâ po ene bourike

### Les lives di spots



Li Live di spots d' Cînè, li l' vray tite, c' est « *Dès spots èt dès ratoûrnûres d'èmon nos-ôtes* », c' est on live di ratourneures et spots walons sicrît pa Reynolds Hostin ey eplaidî e 1971.

\* Cwand l' pourcea end a s' sô, les naveas sont seurs.

\* tchessî a mâle

\* Cwand i ploût sol curé, i gote sol mårîl

\* amisse po-z epronter ; innmi po rapoirter

### Les spots do Singlé

Il ont stî eplaidîs dins l' pitite gazete « *Les Echos de la Cité* » di Sint-Houbert. Il ont stî rmetou e sistinme Feller-Rasgoutaedje et publiyîs so les fyis dins l' waibe « *L' Aberteke* ».

Come i gn a pont d' esplikêye, on n' comprend nén todi les cis ki n' sont nén cnoxhous long et lådje.

\* *Aler rvey su grand-pére*

\* *On n' uze rin a rwêtant*

\* *I gn è nin trêze al douzinne*

\* *L' cî ki mwindje bon tchît mwês*

\* *I fât wårder ene pwâre pou la sè*

**Eciclopedeye :**

**Les boletes di rnådaedje**

Ene bolete di rnådaedje, c' est ene bole rinådêye pa les oujheas magneus d' tchå (u magneus d' pexhons), mins ossu les coirbås, et co toplin d' ôtes oujheas.

Discrijhaedje

Les boletes di rnådaedje sont fwaites des rleyons des proyes ki les oujheas avalèt totes rondes : pwels, ôtes oujheas, schåves d' ôû, ou minme les erieesses di pexhons (vert pexheu).

Ele sont rnådêyes på betch aviè 2 eures après l' egolaedje des proyes.

On lzès rtrove dilé l' ni ou l' djoke des oujheas.

Po les oujheas d' nute magneus d' tchå come li hourete di clotchî, on les rtrove sol plantchî des gregnes, ou å pî des klokîs, u dizo des fis electrikes la k' ele si postêye po-z awaitî ses proyes.



Hourete di clotchî



Aigue d' Amerike



Vert-pexheu avou pexhon

**Belès-letes**

**Alexandre Bodart**

C' esteut on scrijheu e walon d' Assesse. Il a stî sovint eplaidî dins les « Cayés walons ».

**Nosse tchârlî**

On n' sâreu dire kéne âdje il a / On l' a todi cnoxhou parey / Ni grand ni ptit, ni laid ni bea / I durrè ostant k' ses osteyes.

Il est coriant come li tchârnale / Mâgré k' n' est nén pus spès k' ene dôsse / I provént do pays d' Somal. / Et c' est vos dire k' i n' est nén d' pâsse.

Çou ki fwait oneur a s' mestî, / C' est s' tcherpinte on ptit pô toirdowe. / Si dos, télmint k' s' a-st abaxhî / A prins l' minme fôme k' ene djante di rowe.

Si pea a l' couleur di l' âbon ; / Est ç' do sonk k' il a dins les voennes ? / Çou k' lyi dene si foice di demon, / N' est ç' nén putoit del seuve di tchinne ?

Il a totes sôres di machinreyes / Mins si vos lyi vloz fé plaijhi, / Dvizoz lyi des viyès soyreyes / Do tins k' on scweréve sol bati.

Vos vieroz adon ses massales / Ki rodjixhront on tot ptit côp, / del minme couleur ki l' brune estale / Dissu les blankès croles di sâ.

C' est pus ki râle cwand on l' voet rire. / I fwait ene mawe come on cocmwâr / Cwè çki vos vloz, on-z a bea dire / Cwand on n' est d' soce k' avou les moirts.

Ç' n' est pus k' des beurs k' on lyi amoenne / Sins coxhes, et a dmey distchâssîs / Pa les criks et les grossès tchinnes / Et tot plakés pa les brôlîs.

Dins les crevâdes, ene biesse carote, / Tote ewaerêye ki l' âbe fouxhe djus. / Dins on gros nuk, gn a ene tchabote / Ki l' vete sipwè ni rtrovè pus.

I nd a d' keure si l' moxhon berdele / I n' ôt djamây ki l' bwès ki s' plind. / Oubén li rceprece ki winkele. / Cwand elle atake on gros rondin.

A fwait ki l' lame s' efonce dins l' hesse / I sint portant s' coir ki frumjheye / I parvént minme a rdresser s' cresse / Ca c' est d' l' oxhea k' i vént d' soyî.

Et il a l' air di dire « k' è diss ? » / Vla on bon cour pol tcherpetî / Bon come li ci di nosse tchârlî / K' est todi presse a rinde siervice.

**Tchanson**

**Vinoz boere ene pitite taesse**

**I.** A no mājhon, dj' vos assure / Dji fwai sovint pus d' ût eures / Po plaire a m' pitite Rôzete. / A coucou (?) dilé l' vî blok, / El semdi, dji casse el bos / Po rimpli les kertinetes. / Ayir, padzo l' pertigonî / Come dji clatchive sins lâchî, / Al volêye, des côps d' hatchete, / La k' èm feme a vnou criyî / Après mi so l' ouxh di drî / E fihant s' pus bele rizete :

**Resploe**

Vinoz boere ene pitite taesse / Ene pitite taesse di cafè / Vos l' avoz bén merité / Vinoz boere ene pitite taesse

**II.** E rwaitant l' djate di cafè / El pot d' laecea et l' soucrî / Et les biscûtes dins l' coirbeye, / Dji m' a raplé tot d' on côp / Ki dj' m' aveu trové on djoû / Dins ene sitouwâcion pareye. / C' ît on bea dimegne d' esté / Eyet dj' aveu ramoenné / Èm pitit Rôze del dicâce ; / Tot e passant, ès moman / M' aveut dit so l' ouxh di dvant / E m' veyant ene miete bounasse :

**â resploe**


**III.** O! dji n' m' a nén fwait priyî ; / Dj' aveu bén trop peu d' lâchî / Èm djoleye pitite comere. / Intré sins sawè comint / Dj' î la come èn enocin / Presse a rire et presse a braire. / E schoûtant l' bolwere tchanter / Dji sinteu m' cour clicoter / Et dji dmoréve sins rén dire / Mins Rôze a vnou tot doûçmint / Mete ès mwin didins mes mwins / E m' dijhant dins on sorire :

**â resploe**

**IV.** Dins ene pitite taesse di cafè, / I gn a bén del maliçté / Aprestêye pa les comeres ; / Mi, dj' a stî etourpiné / Si rade, ki dj' a stî maryî / al taxhlete - sapinse a m' pere. / Il est vrayi k' â fond d' èm cour / I gn âreut nén yeu d' bouneur / S' i gn âreut nén yeu Rôzete. / Mins tolminme, la, les gârçons, / Reflechixhoz a m' tchanson / Si télcô, on vos repete :

**dierin resploe**

« Vinoz boere ene pitite taesse / Ene pitite taesse di cafè / Vos l' avoz bén merité », / Leyîz l' la, el pitite taesse.

		<p>Cåzaedje : ? Muzike : ? Tchantaedje : Bob Dechamps</p>
---	---	---